



ՄԱՅՐ ԱԹՈՌ ՍՈՒՐԲ ԷԶՍԻԱԾՆԻ
ԿՐՈՆԱԿԱՆ, ՄԵԱԿՈՒԹԱՅԻՆ,
ԼՐԱՏՎԱԿԱՆ ԵՐԿՇԱԲԱԹԱԹԵՐԹ

Ն. Ս. Օ. Տ. Տ. Գարեգին Բ Ամենայն Հայոց Կաթողիկոսի ուղերձը Ամանորի առիթով

(31 դեկտեմբերի 2022 թ.)

Միտքի՛ բարեպաշտ ժողովուրդ ի Հայաստան, Արցախ եւ ի ափսոսաւ,

Մայր Աթոռ Սուրբ Էջմիածնից հայրապետական Մեր օրհնությունը, սերն ու բարեհաղթանքներն ենք բերում ամենիդ:

Նոր տարվա սեմին ենք՝ մեր սպասումներով ու հույսերով, նաև անհանգիստ արտով ու մտահոգություններով: Անցնող տարին մեր ժողովրդի համար գերծ չեղավ տագնապներից, ունեցանք նոր գոհեր ու կորուստներ: Հայրենիքը տակավին կանգնած է անվտանգային մարտահրավերների առջև. լքնասական նշանառության տակ են մեր սահմաններն ու խաղաղ բնակավայրերը: Արցախաբնակ Մեր գաղթականները աննկուն ոգով շարունակում են պայքարել հանուն իրենց անկախ կյանքի իրավունքի պաշտպանության՝ դիմագրավելով բազում նեղությունների՝ նաև Լաչինի ճանապարհի արգելափակումով պայմանավորված: Այսպիսի դժվարին իրավիճակում մենք չենք կարողացել մեր ազգային ներուժով լիարժեք միաբանվել հայրենիքը գործնականում և ծանր կացությունից դուրս բերելու համար: Այսօր աշխարհն ակնթող աշխարհաքաղաքական սուր դիմակայություններ, որ տեղիք են տվել հոգեւոր, սոցիալական եւ տնտեսական բազմազան խնդիրների, նույնպես իրենց անմիջական ներգործությունն են ունենում մեր տարածաշրջանում ծավալվող զարգացումների վրա:

Կրթությանը, առ Աստված սպասվելույթամբ Ամանորի այս երեկո մենք բարեհաղթանքներ ենք ուղղում միմյանց: Բարեհաղթանքներ՝ աշխարհի խաղաղության, մեր հայրենիքի՝ Հայաստանի եւ Արցախի ապահովության ու առաջընթաց կյանքի: Մեր հոգում առավելաբար ակնկալիքներն են մեր կորուստների վերականգնման, հաշտւած խնդիրների հաղթահարման եւ ազգային մեր կյանքի նորոգության:

Միտքի՛նք, քրիստոնյայի առաքելությունն է ապրել հույսով եւ լինել լավատես՝ համոզումով, որ, ինչպես ասում է առաքյալը, «հույսը երբեք չի անաչեցնում» (Հռ. Ե 5):

Պետությունները կործանվում են, ժողովուրդներն անհետանում ոչ թե փորձությունների ծանրությունից, այլ հույսի սպառումից, ապագայի հանդէպ տեսլականի եւ այն կյանքի կոչելու վճռականության բացակայությունից: Մեր ժողովրդի հարազնա երթը եղել է ու պիտի շարունակի մնալ քրիստոսափարիսի հավատքի, հույսի ու լավատեսության պատմություն: Այս վստահությամբ ապրենք ու գործենք՝ ամրորեն կառչած մեր ինքնությանը, մեր լինելության անփոխարինելի գրավականներին՝ հայրենիքին, մեր լեզվին ու մեր հավատքին: Հեռու վանքներ մեզանից վիատությունը, ապագայությունն ու անտարբերությունը եւ հուսառատությամբ համախառնվենք ազգային ու պետական շահերի շուրջ: Գիտակցենք, որ այս է ուղին մեր վիրավոր հայրենիքի ապաքինման, Արցախի մեր ժողովրդի ինքնորոշման իրավունքի պաշտպանության, հայրենիք-սփյուռք միասնականությամբ լուսավոր գաղթի երաշխավորման եւ ազգիս հարստության: Ուստի՝ առաքելական հորդորով «արթո՛ւն լինենք եւ սիրո ու հավատի գրահները հագնենք եւ փրկության հույսի սաղավարտը դնենք» (Ա Թեա. Ե 8-9):

Հայրապետիս աղոթքն է, որ ամենակարող Աստված խաղաղության մեջ պահի մեր հայրենիքը եւ անփորձանք՝ հայրենյաց պաշտպան մեր զինվորներին: Տիրոջ օրհնությունն ու միախաղաղությունն ենք հայցում ծանր կորուստներ կրած բնութանիքներին, ապաքինություն՝ վիրավորներին, շուտափույթ վերադարձ՝ գերեվարված ու անհայտ կորած մեր գաղթականներին:

Ամանորի սեմին միասնաբար հայցենք Ամենակալից, որ նոր տարում մեր ժողովրդին ի Հայաստան, Արցախ եւ ի Սփյուռս պահպանի խաղաղ ու ապահով, սիրով միասնական եւ շնորհի հայրենաշեն ու ազգաշահ իրագործումներ: Թող Տերը մեր կյանքում առատացնի հույսը մեր հայրենիքի ու ազգի ապագայի հանդէպ: Եւ թող Աստծու սերն ու շնորհներն այսօր եւ միշտ ուղեկից լինեն մեզ եւ ամենիդ:

Օրհնյալ, բարի Նոր տարի:

Հայրապետական Սուրբ Պատարագ Սուրբ Ծննդյան եւ Աստվածահայտնության տոնի առիթով

Նունվարի 6-ին մեր Տեր Հիսուս Քրիստոսի Սուրբ Ծննդյան եւ Աստվածահայտնության հոգեւորոգ տոնի առիթով Ն. Ս. Օ. Տ. Տ. Գարեգին Երկրորդ Ծայրագույն Պատրիարք եւ Ամենայն Հայոց Կաթողիկոսը Սուրբ Պատարագ մատուցեց Երեւանի Սուրբ Գրիգոր Լուսավորիչ մայր եկեղեցում:


Հայրապետական խաչվառագարդ թափորը «Խոր-հուրդ խորին» շարականի հանդիսավոր երգեցողության ներքո Ամենայն Հայոց Կաթողիկոսին Սուրբ Տրդատի մատուցեց առաջնորդեց դեպի խորան: Սուրբ Պատարագին որպէս առընթերակներ սպասավորում էին Մայր Աթոռի լուսարարապետ Տ. Մուշեղ եպս. Բաբայանը եւ ԵՊՀ աստվածաբանության ֆակուլտետի դեկան ու Երեւանի Սուրբ Գրիգոր Լուսավորիչ մայր եկեղեցու հոգեւոր տեսուչ Տ. Անուշավան եպս. Ժամկոչյանը:

Սուրբ Պատարագի ընթացքում Ամենայն Հայոց Կաթողիկոսը «Քրիստոս ծնաւ եւ յայտնեցաւ» կենարար ավետիսով ողջունեց աշխարհասփյուռ հայությանը եւ տոնի առիթով հղեց իր պատգամը:

Հավարտ Սուրբ Պատարագի՝ կատարվեց Զորհ-նեք, որի ընթացքում Ամենայն Հայոց Կաթողիկոսը խաչով եւ սրբալույս մյուռոնով օրհնեց ջուրը: Խաչի այս տարվա կնքահայրն է Ժմեւահայ բարերար Հակոբ Ավագյանը:

Զորհնեքի վերջում Վեհափառ Հայրապետը վերստին իր օրհնությունն ու Սուրբ Ծննդյան փրկարար ավետիսը փոխանցեց ներկա հավատավոր ժողովրդին:

Ն. Ս. Օ. Տ. Տ. Գարեգին Բ Ամենայն Հայոց Կաթողիկոսի պատգամը մեր Տեր Հիսուս Քրիստոսի Սուրբ Ծննդյան եւ Աստվածահայտնության տոնի առիթով (Երեւան, Սուրբ Գրիգոր Լուսավորիչ մայր եկեղեցի, 6 հունվարի 2023 թ.)



Ծանուն Հօր եւ Որդւոյ եւ Հոգւոյն Սրբոյ. ամէն:

«Նորոգվեցեք ձեր մտքով եւ հոգով ու հագեք նոր մարդը, որ ստեղծված է ըստ Աստծու»
(Եփ. Դ 23-24):

Միտքի՛ բարեպաշտ հավատացյալներ ի Հայաստան, Արցախ եւ ի ափսոսաւ,

Մեր Տիրոջ՝ Հիսուս Քրիստոսի Սուրբ Ծննդյան եւ Աստվածահայտնության տոնի հրաշագարդ այս օրը, համախառնված մեր եկեղեցիներում, օրհնաբանում ենք նորածին Փրկչին՝ միմյանց փոխանցելով փրկավետ ողջույնը. «Քրիստոս ծնաւ եւ յայտնեցաւ, ձեզ եւ մեզ մեծ աւետիս»:

Ավելի քան երկու հազար տարի Քրիստոսի Սուրբ Ծննդյան ավետիսը հնչում է աշխարհում, արձագանքում մարդկանց հոգիներում՝ որպէս անգուցական հրավեր՝ Քրիստոսով նորոգվելու, խաղաղություն հաստատելու, սերն առատացնելու: «Նորոգվեցեք ձեր մտքով եւ հոգով ու հագեք նոր մարդը, որ ստեղծված է ըստ Աստծու»,– պատգամում է առաքյալը՝ ներշնչված Տիրոջ Սուրբ Ծննդյան ավետիսով: Արդարեւ, Աստվածորդին աշխարհ եկավ՝ մեղանշական մարդուն ցույց տալու փրկության ճանապարհը, որը բացվում է Քրիստոսով նորոգվածների համար: Այս ուղիով են ընթանում Փրկչին հավատացող ու փորձությունների առջև չընկնող հոգիները եւ մեղքի ու չարյաց դեմ աներկբա մարտնչողները: ➔ էջ 2

Հայրաճեական Սուրբ Դասարագ Սուրբ Ծննդյան Եւ Աստվածահայտնության տոնի առիթով

← էջ 1

Քրիստոսի Սուրբ Ծննդյան շնորհները պարզեւում են մարդկությանը օրհնյալ կյանք՝ խարսխւած աստվածայաշտության, բարության, ճշմարտության ու արդարության վրա, հույսով ու լավատեսությամբ են զինում կորուստներից ու ցավներից վշտահար ու հուսաբեկ հոգիներին, ապաքինում եւ լիացնում բարուց ու սիրուց ամայացած սրտերը եւ գորացնում՝ դժվարություններին դիմակայելու, անգամ անվճռելի թվացող ճգնաժամներն ու պատուհասները հաղթահարելու:

Փրկչի Ծննդյամբ մարդկության կյանքում հնչող նորոգության հրավերի անտեսումը, Աստվածորդու պատվիրաններին հակառակ ընթացքը, սակայն, չարիք ու ավեր են սփռում եւ այսօր էլ պատճառ են դառնում հասարակության մեջ, ընտանիքներում գծողությունների ու անհանդուրժողության, ազգերի ու պետությունների միջեւ հակամարտության ու թշնամանքի: Հիշալի, առաքյալի խոսքի համաձայն, «մեղքի վարձը մահն է, իսկ Աստծու շնորհը՝ հավիտենական կյանք» մեր Տեր Քրիստոս Հիսուսի միջոցով (Հռ. 2 23):

Միջերկրէն, Աստվածորդու հրաշափառ Սուրբ Ծնունդը առանձնակի քաջաբերությամբ է համակում, հավատքով գոտեպնդում քրիստոսասեր մեր ժողովրդին, որ վերջին տարիներին ենթարկվեց նոր փորձությունների: Արցախյան պատերազմի եւ ամիսներ առաջ Հայաստանի դեմ Ադրբեջանի կողմից սանձազերծված ռազմական գործողությունների արհաւիրքներում մենք վերստին կրեցինք ծանր կորուստների ցավն ու տառապանքը: Մեր գավակները հերոսաբար գոհվեցին հանուն հայրենիքի, հազարավորները հաշմանդամ դարձան: Մեր տասնյակ գավակներ գերության մեջ են, տակավին կան անհայտ կորածներ: Տեսական ժամանակ արգելափակված է Արցախը Հայաստանի հետ կապող ճանապարհը, ինչը հանգեցրել է հումանիտար աղետի: Այս ծանր իրավիճակում մեր դեմ ծառացած հիմնախնդիրները հաղթահարելու համար մենք կարիքն ունենք ճշմարիտ նորոգության, սրտով, հոգով, մտքով մաքրվելու, Քրիստոսով վերափոխվելու եւ միախորհուրդ ու միական դառնալու ազգի եւ հայրենիքի առջեւ մեր հանձնառությունների մեջ: Այսպիսի նորոգությամբ է, որ կարող կլինենք հայրենական մեր կյանքից բացառել ամենայն չարն ու անարդարը, վախի, բռնության, ատելության ու հարկաբռնականության կործանարար դրսեւորումները եւ հայրենիքի բարվոք ապագայի տեսլականով համախմբել ազգային ողջ



ներուժը, ամրագրել միմյանց հանդեպ հարգանքն ու սերը, վստահության հաստատուն հիմքերի վրա խարսխել Հայաստան—Միջուրը գործակցությունը: Պատմական փորձառությամբ գիտենք, որ ներդրություններից հաղթանակած ենք դուրս եկել, երբ եղել ենք միաբանված ընդհանրական նպատակների շուրջ: Քրիստոսով նորոգված, Քրիստոսով միասնական, Աստծու շավիղներով քայլելով, մենք, ինչպես առաքյալն է ասում, մեզ պաշարած փորձություններից այսօր էլ հաղթական պիտի դուրս գանք (հմմտ. Հռ. Ը 37):

Միջերկրի՝ գավակներ Մեր, Աստծու օգնականությունը խնդրելով՝ ամուր մնանք առ Փրկչի մեր Տերը հավատքի մեջ եւ աներկմիտ սրտով պահպանենք մեզանում Սուրբ Ծննդյան հուսաբեր տոնի հոգեւոր ապրումը: Չորանանք հայրենիքի սիրով եւ ամեն կարելի հնարավորությամբ սատարենք Արցախում եւ Հայաստանի սահմանամերձ շրջաններում դժվարություններ կրող մեր քույրերին ու եղբայրներին: Գիտակցենք, որ պատասխանատու ենք հայրենիքի ու սերունդների առջեւ եւ փտանգի չենթարկվենք մեր անկախ պետականությունը: Մեր բարի գործերը դարձնենք հիմքեր մեր վերելքի ու հաղթության եւ միասնաբար կերտենք մեր հայրենիքի ու ժողովրդի ապահով, լուսավոր գալիքը:

Սուրբ Ծննդյան Պատարագի այս սրբազան պահին հայրապետական Մեր խոսքն ենք հղում խորիմտ ու անվեհեր Արցախի հավատավոր Մեր գավակներին: Միջերկրի արցախցիներ, մեր ժողովրդի մտածումներն ու հայացքները այս օրերին առավելաբար ձեզ են ուղղված: Դուք, որ դժվարությունների առջեւ երբեք չեք ընկրկել ու չեք նահանջել, այսօր էլ տոկոսությամբ շարունակում եք հերոսաբար պայքարել հա-

նուն ձեր ազատ ու անկախ կյանքի, հանուն պատմական արդարության վերականգնման: Ձեր քաջ նախնյաց փառավոր օրինակով հաստատուն ու աննկուն մնացեք հայրենի հողում ապրելու եւ արարելու վճռականության մեջ: Մեր Սուրբ Եկեղեցին աշխարհապիտո իր թեմերով ձեզ հետ է, աջակից ու գորակից ձեզ: Ձեր հիմնարար իրավունքների պաշտպանության արդար պահանջը հաղթանակելու է համայն հայության ջանքերով եւ միջազգային հանրության սատարումով: Հավատում ենք, որ Աստծու ողորմածությամբ մեր ժողովրդը իրեն պատած խավարի մեջ պիտի լույս ծագեցնի եւ դիմազրավի իր կյանքում ծառացած լրջագույն մարտահրավերներին:

Այս զգացումներով ու մտածումներով, Սուրբ Ծննդյան ավետիսով Մեր ողջույնն ենք հղում մեր Սուրբ Եկեղեցու նախապետական պառնեքի գահակալներին՝ Ն. Ս. Օ. Տ. Տ. Արամ Ա Մեծի Տանն Կիլիկիոյ Կաթողիկոսին, Երուսաղեմի Հայոց Պատրիարք Ամենապատիվ Տ. Նորիսան արքեպիսկոպոս Մանուկյանին, Կոստանդնուպոլսի Հայոց Պատրիարք Ամենապատիվ Տ. Սահակ արքեպիսկոպոս Մաշայանին՝ մաղթելով Աստծու գորակցությունը տերունավանդ ծառայության մեջ: Ի Քրիստոս եղբայրական սիրով ողջունում ենք քույր Եկեղեցիների պետերին՝ հայցելով մանկացյալ Փրկչի օրհնությունն իրենց աստվածապատվեր առաքելությանը եւ հավատավոր հոտին: Հայրապետական Մեր սերն ու բարեմաղթանքներն ենք հղում մեր Սուրբ Եկեղեցու ողջ հոգեւոր դասին եւ համայն հավատավոր Մեր ժողովրդին ի հայրենիս եւ ի սփյուռս:

Սուրբ Ծննդյան այս շնորհագարդ առավոտ սրտագին աղոթքով խնդրում ենք ամենակալ Տիրոջը, որ բեթղեհեմյան աստղալույսը հարատւեւ շողարձակի մեր ազգային կյանքի երկնականմարում, որպեսզի մենք, Փրկչին ապավինած, հաստատենք մեր ընթացքը սիրո, համերաշխության ու միասնականության շավիղներում: Թող Սուրբ Ծննդյան կենարար խորհրդով խաղաղություն լինի աշխարհին ու համայն մարդկությանը: Թող հավատքով պայծառացած՝ աշխարհապիտո ազգս հայոց գորացնի իր հայրենիքը՝ Հայաստանն ու Արցախը, իրականություն դարձնի իր նվիրական իդները եւ փառավորի մարդեղացյալ Փրկչին՝ գոհությամբ ձայնելով.

Քրիստոս ծնաւ եւ յայտնեցաւ,
ձեզ եւ մեզ մեծ աւետիս:



Սուրբ Ծննդյան ճրագալույցի Պատարագ

Նոյեմբերի 5-ին Սուրբ Ծննդյան եւ Աստվածահայտնության բերկրալի տոնի առիթով, հանդիսապետությամբ Ն. Ս. Օ. Տ. Տ. Գաբեգին երկրորդ Ծայրագույն Պատրիարք եւ Ամենայն Հայոց Կաթողիկոսի, Ս. Գայանե վանքում մատուցվեց ճրագալույցի Սուրբ Պատարագ, որին մասնակցում էին Մայր Աթոռի միաբանները եւ ուխտավոր հայորդիներ: Պատարագիչն էր Մայր Աթոռի եկեղեցական հայեցակարգային հարցերի գրասենյակի տնօրեն Տ. Վազգեն եպս. Միրզախանյանը:

Միմչ Սուրբ Պատարագը կատարվեց երե-

կոյան ժամերգություն, այնուհետեւ ընթերցվեցին սուրբգրային տարբեր հատվածներ, որից հետո Մայր Աթոռի չորս միաբան սարկավագ ընթերցեց Դանիել մարգարեությունը: Սուրբ Պատարագի ընթացքում Վազգեն սրբազանը, իր քարոզում ներկայացնելով Սուրբ Ծննդյան խորհուրդը, անդրադարձ կատարեց մարդ—Աստված հարաբերությանը. «Թեեւ չենք բացառում մարգարեների, Սուրբ Գրքի մեկնիչների, աստվածաբանների կարեւորությունը՝ Աստծու խոսքը մեզ առավել դյուրին մատուցելու առումով, բայց այսօր կարեւոր է յուրաքանչյուրիս անհա-

տական հաղորդակցությունն Աստծու հետ»: Այս առնչությամբ պատարագիչ սրբազանը հորդորեց ներկաներին թոթափելով աշխարհիկ մտածումները եւ հեռու վանելով մարդու հոգին ու կյանքը մաշող խոհերը՝ խոսել Տիրոջ հետ՝ դեպի երկինք բարձրացնելով մեր անկեղծ աղոթքները:

Վազգեն սրբազանը, անդրադառնալով նաեւ մեր երկրի առջեւ ծառացած մարտահրավերներին, ընդգծեց, որ առկա փորձությունները հնարավոր է հաղթահարել հավատքի, աղոթքի ու նվիրական գործերի շնորհիվ: Սրբազան հայրը վերջում տոնի

առիթով շնորհավորեց հավատացյալ հայորդիներին եւ մաղթեց սուրբծննդյան լուսավոր օրհնությունն ամենքին:

Սուրբ Պատարագի ավարտին՝ նախատոնակի արարողության ընթացքում, Ամենայն Հայոց Կաթողիկոսը բարձրացավ սուրբ խորան եւ վառեց կենսատու մոմը, որից Հիսուս Քրիստոսին խորհրդանշող լույսը բաշխվեց հավատացյալներին:

Այնուհետեւ Մայր Աթոռի միաբանությունը մեկտեղվեց Վեհարանում, որտեղ, նախագահությամբ Վեհափառ Հայրապետի, կատարվեց տարվա առաջին տնօրինները:

Ռուսաստանի Դաճնության Պատվո Շանքան՝ Ամենայն Հայոց Կաթողիկոսին

Նունվարի 10-ին Մայր Աթոռ Սուրբ Էջմիածնում Ն. Ս. Օ. Տ. Տ. Գարեգին Երկրորդ Ճայրագույն Պատրիարք եւ Ամենայն Հայոց Կաթողիկոսին հանձնվեց Ռուսաստանի Դաճնության Պատվո շքանշանը: Վեհափառ Հայրապետը պետական պարգևին արժանացել է ՌԴ նախագահ Վլադիմիր Պուտինի հրամանագրով՝ Ռուսաստանի եւ Հայաստանի միջեւ մշակութային-հումանիտար կապերի զարգացման գործում ունեցած մեծ ավանդի համար:

Արարողությանը ներկա էին Գերագույն հոգևոր խորհրդի անդամներ, հայաստանյան թեմերի առաջնորդներ, Մայր Աթոռի միաբաններ եւ տարբեր կառույցների ղեկավարներ:

Մայր Աթոռ Սուրբ Էջմիածնի արարողակարգային եւ արտաքին հարաբերությունների բաժնի տնօրեն Տ. Նաթան արք. Հովհաննիսյանի ողջույնի խոսքից հետո Հայաստանի Հանրապետությունում Ռուսաստանի Դաճնության արտակարգ եւ լիազոր դեսպան Սերգեյ Կոպիրկինը ընթերցեց ՌԴ նախագահի հրամանագիրը, ապա Նորին Սրբությանը հանձնեց ՌԴ Պատվո շքանշանը:

Այնուհետեւ Ամենայն Հայոց Հայրապետն իր օրհնությունն ու պատգամը փոխանցեց ներկաներին:



Ն. Ս. Օ. Տ. Տ. Գարեգին Բ Ամենայն Հայոց Կաթողիկոսի խոսքը ՌԴ Պատվո շքանշանի հանձնման արարողությանը



Ռուսաստանի Դաճնության մեծարգո դեսպան, Գերաշնորհ, Հոգևորի եւ Արժանապատիվ հայրեր, Գերագույն հոգևոր խորհրդի պատվարժան անդամներ եւ սիրելի ներկաներ,

Ողջունում ենք ամենքիդ ներկայությունը Մայր Աթոռ Սուրբ Էջմիածնում եւ բերում Մեր օրհնությունն ու բարեմաղթանքները Ամանորի եւ մեր Տիրուց Սուրբ Ծննդյան եւ Աստվածհայտնության հոգեւորոգ տոների առիթով:

Ծնորհակալությամբ ստացանք Ռուսաստանի Դաճնության մեծահարգ նախագահ տիար Վլադիմիր Պուտինի կողմից Մեզ շնորհված Ռուսաստանի Դաճնության Պատվո շքանշանը՝ մեծարգո դեսպան տիար Սերգեյ Կոպիրկինի ձեռամբ: Հայրապետական Մեր մաղթանքներն ու օրհնությունն ենք բերում ի դեմս Ձեզ, պարոն դեսպան, Ռուսաստանի Դաճնության նախագահին՝ ազնիվ ուշադրության եւ գնահատանքի համար:

Մեր ժողովուրդներն ունեն դարավոր բարեկամության հարուստ պատմություն, որը կոխվել ու թրծվել է համատեղ կրած նեղություններով ու դժվարություններով եւ բազում հաղթանակներով: Մեր ժողովուրդների եղբայրությունը ամրորեն հաստատված է քրիստոնեական մեր հավատքի ու դավանած բնութանոր արժեքների վրա: Հայ-ռուսական փոխհարաբերությունների պատմության ընթացքում, այդ եւ անկախության հռչակումից ի վեր մեր ժողովուրդը զգացել է բարեկամ Ռուսաստանի բարյացակամ վերաբերմունքը եւ գորակցությունը: Այսօրինակ բարեկամության ցայտուն վկայության ակնատեսը եղանք, երբ Ռուսաստանի Դաճնության եւ անձամբ նախագահ Վլադիմիր Պուտինի անմիջական ջանքերով դադարեցվեց 2020 թվականի արցախյան արյունալի պատերազմը, նաեւ շարունակվում է կարեւոր աջակցությունը պատերազմի աղետալի հետեւանքների հաղթահարման, Արցախի մեր ժողովրդի անվտանգության ապահովման, Դադիվանքի եւ հայոց հնամենի սրբավայրերի պահպանության գործում: Ամենքիս հոգին այս օրերին անհանգիստ է Լաչինի միջանցքի արգելափակման պատճառով Արցախում ստեղծված հումանիտար ճգնաժամով: Աղոթում ենք, որ արդյունավորվեն ռուս խաղաղապահների ջանքերը՝ ուղղված Լաչինի միջանցքի արգելափակման վերացմանը եւ Արցախում տիրող աղետալի վիճակի հաղթահարմանը: Թող Ամենակալի օգնականությամբ մեր տարածաշրջանը վերագտնի իր խաղաղությունը, վերականգնվի

Հայաստանի տարածքային ամբողջականությունը, եւ միջազգային հանրության կողմից ճանաչվի Արցախի մեր ժողովրդի՝ հայրենի հողում ապահով, ազատ ու անկախ ապրելու իրավունքը:

Միևնույն ժամանակ, Ռուսաստանի Դաճնության այս բարձր պարգևի շնորհումը դիտարկում ենք հայ-ռուսական բարեկամության, Հայաստանի եւ Ռուսաստանի միջեւ հոգևոր-մշակութային կապերի զորացման գործում Հայոց Եկեղեցու պատմական դերակատարության արժեքնման համատեքստում, նաեւ որպես գնահատանք Ռուսաստանի կրակքում հայ համայնքի կարեւոր ավանդի: Մեր ժողովուրդների բարեկամության ակունքներում Հայ եւ Ռուս Եկեղեցիների եղբայրությունն է: Մոսկվայի եւ Համայն Ռուսիո Կիրիլ Պատրիարքի՝ ի Բրիստոս Մեր սիրեցյալ եղբոր հետ սերտ գործակցության մեջ ամենայն ջանք ի գործ ենք դնելու համար մեր ժողովուրդների դարավոր բարեկամության առաւել աւարակնման եւ հարստեւության:

Մեր աղոթքն ենք բարձրացնում առ Աստված, որ այսօրվա փոթորկոտ եւ տագնապներով լի աշխարհում ամենողորմ Տերը խաղաղության իր շնորհների հետ համայն մարդկության կրակքին եւ ապահովության ու բարօրության մեջ պահի մեր եղբայր ժողովուրդներին՝ պարգեւելով արդյունաշատ գործակցություն եւ մշտանորոգ ձեռքբերումներ մեր բարեկամ երկրներին: Այս առիթով, հարգարժան պարոն դեսպան, հանեցեք Ռուսաստանի Դաճնության նախագահ մեծարգո տիար Վլադիմիր Պուտինին Բրիստոսի Սուրբ Ծննդյան կենարար ավետիսի հետ մեկտեղ փոխանցել Մեր երախտագիտությունը եւ կենաց արեւշատության, հաջողությանը եւ Ռուսաստանի առջեւ ծառացած մարտահրավերների ու փորձությունների շուտափույթ հաղթահարման բարեմաղթանքները:

Թող Աստված օրհնի եւ անսասան պահի բարեկամությունը մեր եղբայր ժողովուրդների:



Ամենայն Հայոց Կաթողիկոսի այցելությունը մարտական դիրքեր

Դեկտեմբերի 31-ին Ն. Ս. Օ. Տ. Տ. Գարեգին Երկրորդ Ճայրագույն Պատրիարք եւ Ամենայն Հայոց Կաթողիկոսը ՀՀ ՁՈՒ հոգևոր առաջնորդ Տ. Սովսեւ վրդ. Սարգսյանի, Գեղարքունյաց թեմի առաջնորդական տեղապահ Տ. Պարթեւ վրդ. Բարսեղյանի եւ Մայր Աթոռ Սուրբ Էջմիածնի միաբանների ուղեկցությամբ այցելեց Հայաստանի Հանրապետության արեւելյան սահմանագծի մարտական դիրքեր: Նորին Սրբությանը դիմավորեց ՀՀ ՊՆ գլխավոր շտաբի պետի տեղակալ գեներալ-մայոր Առաքել Մարտիրոսյանը:

Հայոց Հայրապետը, իր օրհնությունն ու բարեմաղթանքները փոխանցելով հայրենյաց պաշտպաններին, մեծապես արժեւորեց հայ զինվորների եւ հրամանատարների նվիրյալ ու անձնագործ ծառայությունը հայրենիքին:

Ամենայն Հայոց Կաթողիկոսն անփորձանք եւ ապահով ծառայություն մաղթեց ամենքին՝ մշելով, որ մեր զինվորականները մշտապես հիշվում են Հայոց Հայրապետի եւ հայ եկեղեցականների աղոթքներում:

Ամենայն Հայոց Կաթողիկոսի այցելությունը «Եռաբլուր» գինվորական Պանթեոն

Նունվարի 1-ին Ն. Ս. Օ. Տ. Տ. Գարեգին Երկրորդ Ճայրագույն Պատրիարք եւ Ամենայն Հայոց Կաթողիկոսը եպիսկոպոսաց դասի եւ Մայր Աթոռ Սուրբ Էջմիածնի միաբանների հետ այցելեց «Եռաբլուր» գինվորական պանթեոն՝ հարգանքի տուրք մատուցելու հայրենիքի անկախության ու պաշտպանության համար իրենց կյանքն ընծայաբերած հայորդիների հիշատակին:

Ռականաց դասն աղոթք բարձրացրին առ Աստված՝ նահատակ քաջորդիների հոգիների խաղաղության համար: Նորին Սրբությունն ու եկեղեցականներն առանձնաբար այցելեցին նաեւ ազգի հերոս զավակների շիրիմներին՝ բերելով իրենց խոնարհումն ու աղոթքը:

Լրատվական նյութերը՝
Մայր Աթոռ Սուրբ Էջմիածնի
տեղեկատվական համակարգի



Եթե այլ խոսքով նկարագրենք այս հրաշքը, պետք է վկայենք, որ աշխարհացունց այս օրը տեղի ունեցած եւ ունեցող սքանչելիքը Սրբության ծնունդն է... Սրբություն, որ մարմին է առնում հանուն այն մի բուռ երազանքի եւ այն չնչին հույսի, որը ճառագում էր լույս աշխարհի եկած Մանկան վճիտ աչքերում: Նայե՛ք Նրան՝ այդ Մանկանը, որ Իր ամենասրբուհի Մայր Աստվածածնի գրկում է: Նայե՛ք մանուկ Հիսուսի լուսալի աչքերին, որոնք ասես խոսում ու սեր են քարոզում, սեր՝ որպես միաբնակություն՝ ընդդեմ ամեն չարիքի:

Հիրավի, Սուրբ Ծնունդը ոչ այլ ինչ է, եթե ոչ այդ սիրո անլուծ քարոզչությունը: Եթե Քրիստոս՝ Աստուծու Միածին Որդին, ծնվելուց զատ, այլ հրաշք այլևս չգործեր, միայն Նրա ծնունդը բավ էր մարդկությանը սիրո հաղթանակի մասին պատմելու եւ այդ սերը, որպես ժառանգություն, մարդկության բոլոր սերունդներին ավանդելու համար: Մեզ ավետարանված այդ սիրո զորությունը փոքր-ինչ պատկերացնելու համար պետք է խոկանք այն խոնարհության շուրջ, որը բնորոշ էր Փրկչի ծնունդին: Մանուկ Հիսուս ծնվեց մթին ու մռայլ քարայրում (Սուրբ Աստվածածինը խանձարուրով փաթաթեց Նրան եւ դրեց մսուրի մեջ. հմմտ. Դուկ. Ա 3-7)՝ զուրկ ամեն տեսակի ճոխությունից, որ վայել պետք է լիներ երկնքի գահավորակին բազմած Աստվածորդուն: Աստված մարդկային մարմին առավ, որպեսզի երկնքի գահավորակին բազմեցնի մարդկային ծնունդ եղող ամեն էակի՝ ծնված ամենախոնարհ մսուրում կամ թե ամենաշքեղ, արքայական պալատում:

Մանկանը երկրպագելու եկած հովիվներին ավետվել էր, որ Նա աշխարհի ճշմարիտ Փրկիչն է, Որի կարիքը իրենք այդքան զգում են:

Աստվածորդին ծնվեց հանուն ամենքի. Նա լույս աշխարհի եկավ հանուն Լուսի հաղթանակի եւ Իր անմար լույսով ողողեց համայն տիեզերքը: Սուրբծննդյան ավետիսն առաջինն ստացան հովիվները, ապա տարիներ, տասնամյակներ ու դարեր շարունակ այդ Ծնունդը անընդհատաբար լուսավորեց եւ այժմ էլ լույսով է զարդարում բոլոր նրանց հոգիները, ովքեր չեն զլանում իրենց հայացքը դարձնել դեպի Փրկիչ-Մանուկը, Որը հույսով լեցուն հայացքով մշտապես նայում է մեզ՝ լինենք հասարակ հովիվ թե հզոր թագավոր:

Քրիստոսի ծնունդն ամենքիս ծնունդն է, մարդկային հոգու վերածնունդն է Սուրբ Ծնունդը: Երբ երկրային կյանքի փոթորիկները, փորձությունները, տառապանքն ու ցավը խավարում, մթագում են մեր ուղին, Սուրբ Ծնունդի ամենամյա տոնը մեզ համար լույսի շող է դառնում՝ հիշեցնելով ամենակարող Աստծու սքանչելի փրկագործությունը՝ մեզանից յուրաքանչյուրին դեպի երկնք բարձրացնելու եւ ոչ թե մսուրում, այլ երկնային լուսազարդ օթեաններում խանձարուրելու, Իր իսկ աստվածային գրկում մեր մանկացած հոգիները բարուրելու:


Աստվածորդու անճառելի փրկագործությունը սիրո աննահանջ ձեռքնեկունն է՝

ուղղված յուրաքանչյուրիս: Սուրբ Ծնունդը, ահավասիկ, դարձյալ մեկ հնարավորություն է՝ ապացուցելու, որ մարդկության փրկության հույսը ոչ թե սին պատրանք, այլ բերկրալի ուրախություն է, եւ Միածնի ծնունդն իրապես հաճություն է մեզ՝ մարդ արարածներիս համար, երկրի վրա՝ խաղաղություն, իսկ բարձունքներում՝ փառք ամենակարող Աստծուն:

Սուրբ եկեղեցու խորանն ասես վերածվել է բեթղեհեմյան քարայրի, ուստի եկե՛ք ամենքս մոտենանք ու ծնրադիր մեր գիրկն առնենք խանձարուրի մեջ բարուրված այն աղբատ ու փոքրիկ Մանկանը, Որն իրականում աշխարհի Տերն ու Փրկիչն է, եւ հայցենք Նրանից, որ մեզ վերածնի որպես մանուկների՝ սուրբ, մաքուր եւ անապական:

Աղերսենք այդ Մանկանը, որ Իր սրտի այն մի բուռ լույսը՝ սփռված համայն տիեզերքով մեկ, մեզ էս լուսավորի ու առաջնորդի դեպի փրկության ճանապարհը, դեպի կյանքն ու հավիտենականությունը. ամեն:

ԱՄՆԱ ՀՈՎՍԵԹՅԱՆ



ՍՈՒՐԲ ԾՆՆԴՅԱՆ ԱՎԵՏԻՍԸ

Սուրբ Ծնունդ.... Պատկերացնում եք, թե այս տոնը որքան խորախորհուրդ եւ մեծիմաստ է: Սուրբ Ծնունդ. իրար միախուսված այս բառերն արդեն պատմում են մի սքանչելի իրողության, այնպիսի հրաշքի մասին, որն իր աներեւույթ թելերով պարուրում է համայն մարդկությանն ու իր միածին մանկան մամն գոլորտում: Ո՞վ է, ուրեմն, այդ հրաշքը Հորինողը, որքան սքանչելի եւ կարեւոր է այն մարդկության, մարդկային հոգու համար: «Սրբություն»-ը, որ բնութագրում է ամենակարող Աստծուն, եւ «ծնունդ»-ը, որը մարդկային էակին հատուկ իրողություն է, իրենց աներեւակայելի միությանը պատկերում են միակ Սուրբ եւ ամենագութ Աստծու խոնարհումը մինչեւ մարդու, մարդկային ամենախոնարհ աստիճանը: Մարդկային բոլոր ծնունդներից ամենահրաշալիին էր հենց այն Ծնունդը, քանի որ ծնվում, մարմին էր առնում Ինքը՝

Ամենին ու Ամենամիմը, Նա, Ուն ամենաբովանդակ եւությունը չի պարփակվում անգամ երկնքի անհուն տարածության մեջ, Նա, Ով վեր է տարածությունից ու ժամանակից: Եվ ահա Նա՝ Ամենամանկը, հավիտենական ու անսահման Աստված, հանձն է առնում սահմանավորվել եւ ժամանակի մեղ ու անձուկ խորխորատը թափանցել՝ այնտեղից դեպի անժամանակյա անհունը բարձրացնելու ամենախոնարհին, ամենաթույլ, ամենամեղավոր ու ամենասահմանավոր էակին՝ մարդուն:

Սուրբ Ծնունդ. ահա թե որ բառերով է բնութագրվում այն իրողությունը, երբ Սրբությունը հաղորդակից է դառնում անսուրբին, մեղավորին ու անկարողին, եւ դա անում է ոչ թե, քան լիցի, միայն մարդկային հոգին առնելով, այլ համակ մարդուն՝ հոգի եւ մարմին ունեցող այդ էակին հավասարվելով Իր ամենասուրբ ծննդյամբ: Եվ



Ծննդյան գիշեր

Մի մրկ գիշեր, աղոտ մի լույս, Ու մի Մանուկ՝ եկած աշխարհ, Սրտում՝ թախիծ, աչքերում՝ հույսն Արարչության անապաշխար...

Մսուրի մեջ խանձարուրված՝ Մի բուռ դարձավ Աստված համայն, Աստղ ու երկինք՝ իրար անցած, Փառքն էին երգում Փրկիչ-Մանկան:

Մութ խավարում գիշերային Հովիվ ու մոգ դարձան վկան Ու մարգարեն աստվածային Սուրբ Ծննդյան քրիստոսական...

Լուռ բարուրվեց Աստված անբավ Իր արարած ձեռքերի մեջ, Լույսն անստվեր ճրագ դարձավ, Որ աշխարհը մնա անշեշ:

Մութ խավարում աղոտ Մի լույս՝ մի բուռ Աստված բյուր-բյուրացավ՝ Սրտում՝ թախիծ, աչքերում՝ հույս, Քրիստոս ծնավ եւ հայտնեցավ...

Գետորգ սրկ. ԿԱՐԱՊԵՏՅԱՆ

Մյուռնոնը Հայոց եկեղեցու ծիսապաշտամունքային համակարգում գործածվող (թերեւս ամենաշատը) մյուսերից է: Այս սրբազան յուղով են օծում ծիսական արարողությունների ժամանակ օգտագործվող առարկաները, ինչպէս նաեւ եկեղեցիները, խաչերը, պատկերները եւ այլն: Ձեռնադրությամբ եւ սրբալոյս մյուռնով օծմամբ են քահանաները հոգեւոր իշխանություն եւ սպասավորության իրավունք ստանում: Ըստ Հրաչյա Աճառյանի՝ «մյուռն»-ը հունարէն բառ է (μύρον) եւ թարգմանաբար նշանակում է «յեղով անուշահոտութիւն, հոտաւետ իւղ» (Հր. Աճառյան, Հայերէն արձատական բառարան, հտ. Գ, Երեւան, 1977, էջ 326): Պետրոս վրդ. Ճիգմէճյանն իր կազմած բառարանում «մյուռն» բառը բացատրում է իբրեւ «օծման անուշահոտ սուրբ իւղ» (Պետրոս վրդ. Ճիգմէճյան, Հայերէն աշխարհաբար լեզուի լիակատար բառարան, Հայկա, 1957, էջ 1008), իսկ Ստեփան Մալխասյանը՝ «...ծիթապտղի մաքուր իւղ, հետը խառնած զանազան անուշահոտ հիւթեր, որ համդետով օրհնում են եկեղեցուն» (Ստ. Մալխասեան, Հայերէն բացատրական բառարան, Երեւան, 1944, էջ 307): «Նոր բառգիրք հայկազեան լեզուի» բառարանում նշվում է, որ «մյուռն» բառը ծագում է հունարենից եւ թարգմանվում է «իւղ անոյշ... ի դրոշմել զմկրտեալս, յօծանել զքահանայս եւ զսուրբ սեղանն եւ զսուրբ սպասս» (անդ, հտ. Բ, Վեներտիկ, 1837, էջ 252): Այս բոլոր բացատրություններում ընդգծվում են մյուռնի անուշահոտությունն ու ծիսական կիրառությունը:

Մյուռնոնն առաջին անգամ հիշատակվում է Հին Կտակարանում՝ մասնավորապէս Ելից գրքում, սակայն «օծության յուղ» անվամբ: Համաձայն այս վկայության՝ Աստված Մովսէսին պատվիրում է. «Եւ դու ան քեզ խունկս անուշունս, ծաղիկ ընտիր զմշտնեմեաց հինգ հարիւր սիկլ, եւ կինամոնն զանոյշ զկէս այնորիկ՝ երկերիւր եւ յիսուն, եւ զխունկեղեզ զանոյշ երկերիւր եւ յիսուն, եւ հիրիկ հինգ հարիւր սիկլ ըստ սրբութեանն, եւ իւղ ի ձիթեմեաց հիմենաւ միով: Եւ արասցես զայն իւղ յօծումն սրբութեան, իւղ եփեալ ըստ արուեստի իւղագործաց, իւղ յօծումն սրբութեան լինիցի» (Ելք Լ 22–25): Այնուհետեւ Աստված պատվիրում է յուղով օծել վկայության խորանը, զոհասեղանն ու ամբողջ սպասքը, ինչպէս նաեւ քահանաներին (հմմտ. Ելք Լ 26–31): Ըստ հինկտակարանյան վկայությունների՝ օծմամբ էին իշխանություն ստանում թագավորները, մարգարէները, քահանաները, որոնք, Աստծու Հոգով լցված, պետք է առաջնորդէին ժողովրդին: Քահանաների օծմանն է վերաբերում Ելք գրքի ԻԸ 41-ը. Աստված պատվիրում է Մովսէսին. «Եւ օծցես զնոսա, եւ լցցես զձեռնս նոցա, եւ սրբեսցես զնոսա՝ զի քահանայացիս ինձ» (ԻԸ 41): Հին Ուխտումնակարագրվում է, թէ ինչպէս է Սամվէլ մարգարէն վերցնում յուղով լի սրվակն ու հեղում Սաւուդի գլխին՝ նրան օծելով թագավոր (ԱԹագ. Ժ 1): Աստվածաշնչում բազմաթիվ վկայություններ են առկա նաեւ մարգարէների օծման վերաբերյալ: Օրինակ՝ Աստծու պատվերով եղիան մարգարէ է օծում եղիսեին (ԳԹագ. ԺԹ 16): Սուրբգրային վկայությունների հիմամբ կարող ենք եզրակացնել, որ Հին Ուխտումն օծության յուղը համարվում էր մյուսերէն ու տեսանելի այն միջոցը, որով մաքրագործվում, սրբագործվում էին թէ մարդիկ, թէ առարկաները:

Նոր Կտակարանում եւս հիշատակություններ կան օծության յուղի վերաբերյալ: Հակոբոս առաքյալն իր Ընդհանրական թղթում գրում է. «Վշտանայց՞ ոք ի ձեմք, յաղօթս կայցէ. բերկրից՞ ոք, սաղմոս ասասցէ. հիւանդանայց՞ ոք ի ձեմք, կոչեսցեն զերիցունս եկեղեցւոյն, եւ արասցեն ի վերայ նորա աղօթս, օծցեն իւղով յանուն Տեառն» (Հակ. Է 14): Նորկտակարանյան այս հատվածը հստակ վկայում է, որ հիվանդներին օծելու ավանդույթն առաքելափաստաւոր է եւ սկզբնավորվել է եկեղեցու վաղ շրջանում:

Նոր Կտակարանում յուղով օծումը նաեւ հարգանքի, մեծարանքի նշան էր: Մար-



Սրբալոյս մյուռն

կոսի Ավետարանում նկարագրվում է, որ Բեթանիայում՝ բորոտ Սիմոնի տանը, Հիսուսին մոտենում է մի կին եւ յուղի շիշը կոտրելով՝ անուշաբույր մյուռն հեղում է Նրա գլխին (հմմտ. Մարկ. ԺԳ 3): Այս դեպքը հիշատակում է նաեւ Հովհաննէս ավետարանիչը. «Իսկ Մարեմայ առեալ լիտր մի իւղոյ մարդեան ազնուի մեծագնոյ, օծ զոտան 3իսուսի, եւ հերով իւրով մաքրէր զոտս նորա. եւ տունն լի եղէ ի հոտոյ իւղոյն» (Հովհ. ԺԳ 3):

Քրիստոս նշանակում է Օծյալ (այս մասին առավել մանրամասն տես Henry George Liddell, Robert Scott, Greek-English Lexicon, Oxford, 1968, էջ 2007). համաձայն Ղուկասի Ավետարանի՝ Աստծու Որդին Իր մասին հայտնելիս շեշտում է, որ Իր միջոցով իրականացավ Եսայիի մարգարէությունը. «Հոգի Տեառն ի վերայ իմ, վասն որոյ եւ օծ իսկ զիս. աւետարանել աղքատաց առաքեաց զիս, բժշկել զբեկեալս սրտիւ...» (Ղուկ. Դ 18): Եթէ Փրկչի ծնունդից առաջ օծվում էին Աստծու ընտրյալ մահկանացուները միայն, ապա Քրիստոս Իր էությանը եւ վերին կանխասահմանումով ըստ ինքյան բացարձակ օծումն էր ներկայացնում (Հ. Քոստյան, Սրբալոյս մյուռն, «Էջմիածին», 1992, 2–է, էջ 43): Դ դարի եկեղեցու նշանավոր հայր Կյուրեղ Երուսաղեմացին այս առնչությամբ գրում է. «Քրիստոս մարմնով՝ մարդու կողմից չօծվեց յուղով կամ մյուռնով, այլ Հայրը Նրան, համայն աշխարհի համար Փրկիչ նախասահմանած լինելով, օծեց Սուրբ Հոգով» (Ս. Կյուրեղ Երուսաղեմացի, Կոչումն ընծայության, Թարգմ.՝ Ս. Կրկյաշարյանի, Ս. Էջմիածին, 2007, էջ 372):

«Գործք առաքելոց»-ը վկայում է ջրով մկրտության մասին. առաքյալն իր ձեռքը դնում էր ջրով մկրտվածի գլխին, որ վերջինս Սուրբ Հոգի ստանա. «Յայնժամ եղին զձեռնս ի վերայ նոցա, եւ առնուին Հոգի Սուրբ» (Գործք Ը 17): Հետագայում, ինչպէս իրավամբ նշում է Կարապետ եպս. Տեր-Մկրտչյանը, «...հաւատացեալների համայնքի մէջ սովորութիւն մտաւ մկրտեալներին իւղով օծել կամ դրոշմել իբրեւ Ս. Հոգին

ընդունելու եւ նոր մարդ լինելու նշան» (Կարապետ եպս. Տեր-Մկրտչեան, Սուրբ միւռնի օրհնութիւնը, Ս. Էջմիածին, 2008, էջ 10–11): Այսօր եւս եկեղեցին շարունակում է օգտագործել օծության յուղը՝ իբրեւ Սուրբ Հոգու խորհրդանիշ:

Հայոց եկեղեցուն մյուռնի գործածությունն սկսվում է Դ դարից. այս մասին վկայում է Ազաթանգեղոսը. «Եւ իբրեւ իջանէին մարդիկն ամենայն եւ թագաւորն ի մկրտութիւն անդր, ի ջուրսն Եփրատ գետոյն՝ նշանս քթանշէի երեւեալ յԱստուծոյ. զի գետը առեալ ջուրք գետոյն՝ անդրէն դարձան ընդ կրուկն: Եւ լոյս սաստիկ երեւեալ ի նմանութիւն սեան լուսաւորի՝ եւ եկաց ի վերայ ջուրք գետոյն եւ ի վերայ նորա նմանութիւն տէրունական խաչին եւ այնչափ ծագեաց լոյսն, մինչեւ արգելոյր զճառագայթս արեգականն եւ նուաղեցուցանէր: Եւ իւղն օծութեան, զոր արկանէր Գրիգորիոս ի վերայ մարդկանն՝ շրջան առեալ ի մէջ գետոյն ջուրք զմարդկան խաղայր» (Ազաթանգեղոս, Հայոց պատմութիւն, աշխ.՝ Ա. Տեր-Ղեւոնդեանի, Երեւան, 1983, էջ 464): Այստեղ պատմիչը ներկայացնում է մյուռնի առաջին կիրառությունը Հայոց հավատքի հայր Ս. Գրիգոր Լուսավորչի (302–325 թթ.) ձեռամբ: Սրբալոյս մյուռնը Ս. Գրիգոր Լուսավորչից սերնդեսերունդ եկել ու հասել է մեզ: Երբ ամեն անգամ նոր մյուռն է օրհնվում, հին մյուռնը խառնվում է նորին, եւ այսպէս շարունակաբար փոխանցվում է Ս. Գրիգոր Լուսավորչի օրհնած մյուռնից: Անանիա Սանահնեցին իր երկում այս մասին գրում է. «...յորժամ արհնեմք զմիւռնն, զիին մեռնն ի նորն խառնեմք եւ այնպէս արհնեմք, սկսեալ ի սրբոյն Գրիգորէ եւ ի սրբոյն Սահակայ մի-

չեւ ցայսաւր նոյն միւռնն կատարի եւ զայ մինչեւ ցայժմ, ընդունելով միշտ զմորիս Հոգւոյն Սրբոյ...» (Անանիա Սանահնեցի, Աստվածաբանական երկեր, աշխ.՝ Հակոբ Քյոսեյանի, Ս. Էջմիածին, 2000, էջ 302): Իսկ Մաղաքիա արք. Օրմանյանը նշում է, որ մյուռնօրհնության ժամանակ «սովորութիւն է նաեւ մէկ երկու լիտր հին միւռնն խառնել նոր պատրաստուած միւռնին, որպէսզի սոյն կերպով միշտ հինը նորին կապուած մնայ: Ժողովրդական աւանդութիւն է, թէ այս խառնուրդի շարունակութեամբ այժմեան միւռնը կը կցուի Յիսուսէ օրհնուած ձէթին հետ, զոր առաքեալներ Հայաստան բերին իրենց հետ...» (Մաղաքիա արք. Օրմանեան, Հայոց եկեղեցին, Երեւան, 1993, էջ 168):

Ս. Գրիգոր Լուսավորչի ժամանակներից մինչեւ այսօր մեր ժողովուրդը մեծազույց հավատով ու երկյուղածությամբ է ներկա գտնվել սրբալոյս մյուռնի օրհնությանը եւ մյուռնի կաթսայի առջեւ ծնրադիր՝ հաղորդակցվել է իր սրբազան նախնիների հավատքին: Այս առումով դիպուկ է Սահակ եպս. Տեր-Հովհաննիսյանի բնորոշումը. «Սրբալոյս մեռնի կաթսան հայ հավատացյալ եւ հայրենասեր ժողովրդի մեռնաբույր սիրտն է, ուր հայ հավատքն ու հոգին, հայ կյանքն ընդհանրապէս օրհնվում, շատանում եւ իբր մասունք բաշխվում է բոլոր ժամանակների հայությանը» (Սահակ եպս. Տեր-Հովհաննիսյան, Սրբալոյս մյուռնի օրհնությունը, «Էջմիածին» 1955, Ը, էջ 20):

Մյուռնօրհնության ժամանակ տասնյակ հազարավոր ուխտավոր աշխարհի տարբեր վայրերից եկել հասել է Սուրբ Աթոռ՝ մասնակից դառնալու Հայոց եկեղեցու սրտագրավ եւ մեծաշուք արարողությանը: 1886 թվականին Մակար Ա Թեղուտցի հայրապետը (1885–1891 թթ.) կատարում է իր անդրանիկ մյուռնօրհնությունը: Արարողությանը մասնակցում է նաեւ բժիշկ Միսակ Արամյանը, որն իր ապրումները, հուշերն արտացոլում է «Ճանապարհորդութիւն Սալիանից դէպի Էջմիածին» ուղեգրության մէջ. «Չկար երկրագնդիս երեսին մի կէտ, մի վայր, որտեղ տարագիր ու նժդեհ հայը բնակութիւն է հաստատել, որ իւր ներկայացուցիչը չունենար այս աշխարհախումբ ամբողջի մէջ: Բոլոր Վաղարշապատը՝ իւր ընդարձակ տարածութեամբ, թւում էր, թէ համասփիւռ հայութեան աշխարհահամդէս էր: Քանի տարագ տիպարների, զգեստների,

սովորութիւնների եւ բնաւորութիւնների: Ով կամենում է ուսումնասիրել եւ ճանաչել հայութեանը, նա անպատճառ պարտաւոր է Ս. Միւռնի օրհնութեան՝ Էջմիածին գնալ: Դուք այստեղ կիմանաք, թէ ինչ մեծ զօրութիւն կայ ուխտագնացական սովորութեան մէջ» (Ս. Արամեան, Ճանապարհորդութիւն Սալիանից դէպի Էջմիածին, Տփղիս, 1887, էջ 151): Այնուհետեւ նկարագրելով օրհնության արարողությունը՝ հեղինակը գրում է. «...ամբողջ կորցրած է ինքնազսպութեան զօրութիւնը. նա անպայման ենթարկուած է նոյն ռոպէին նրա ամբողջ գոյութիւնը համակած ան-

գուսպ ցանկութեան... որի սիրտն է զնում, որը նուազում է, որը թուլանում է: Բայց ով կարող է դրանց դուրս բերելով ազատել. անցք, ճանապարհ ամենեւին չկայ. շարժուել՝ նշանակում է առաւել ճնշուել քրտինքը քամող ջխտիչի տակ: Արարողութիւններին եւ ընթերցուածներին ունկնդիր լինելու մասին ամեն ինչ անգամ կարելի չէ... Ես զգում եմ, որ նուազում եմ. մատս սաստկութեամբ կրծում եմ, որ զգայութիւնս արթուն մնայ: Հազար վերստ կտրել, ինչ է՝ միւռնի օրհնութիւնը տեսնիլ եւ նուաղիլ: Չէ, լաւ է մեռնել, բայց գոնէ բաց աչքով տեսնել... Ամենեւին չեմ կարող մեղադրել նրան, որ պատրաստ է ամեն բան ոտնահարել, միայն թէ տեսնի միւռնի եփ զալը...» (Ս. Արամեան, նշվ. աշխ., էջ 160–161):



Ուշագրավ դրվագներ ջրօրհների պատմությունից

Վաղնջական ժամանակներից ի վեր Հայ եկեղեցուն Սուրբ Ծննդյան եւ Աստվածափայտության տոնի ամբաստելի մասն է կազմում ջրօրհները՝ իբրեւ Հորդանան գետում Հիսուսի մկրտության խորհրդանշ։

Ս. Գրիգոր Տաթևացու վկայությամբ՝ Բարսեղ Կեսարացին է սահմանել ջրօրհների կարգը, որը Սահակ Ա Պարթև կաթողիկոսի (387–439 թթ.) կարգադրությամբ ներմուծվել է Հայ եկեղեցու ծիսապաշտամունքային համակարգ։

Մեր օրերում շատերս ենք Սուրբ Ծննդյան պատարագից հետո եկեղեցիներում ներկա լինում ջրօրհներին։ Միջդեռ վաղ շրջանում եկեղեցական այս կարգը կատարվել է եկեղեցիներից դուրս՝ մերձակա գետերի ջրերում։ Հովհաննես Օձնեցու (717–728 թթ.) կանոնը պատվիրում է. «Պարտ եւ արժան է Յայտնութանն աւուր կատարել զգրոյն աւրինութիւն ի վերայ ջուրն ըստ պատշաճի ի տեղիսն հանդիպեալ, ձեք արկանելով ի նա եւ աղաթս մատուցանելով. ի ձեռն այնորիկ յիշատակել զառ ի Փրկչէն վասն մեր ի Յորդանան զմկրտութիւնն»։ Գետերում կատարված ջրօրհների բազմաթիվ դրվագներ են հանդիպում Հայ եկեղեցու պատմության էջերում։ Դրանցից առավել հայտնին Պետրոս Ա Գետադարձ կաթողիկոսի (1019–1058 թթ.) կատարած ջրօրհների պատմությունն է։

Մեր պատմիչների վկայությունների համաձայն՝ սույն ջրօրհները կատարվել է Տրապիզոնում՝ Մաշկա գետակի վրա, 1023 թվականի հունվարի 6-ին, Բյուզանդիայի Վասիլ Բ կայսեր ներկայությամբ՝ ապացուցելով հայոց հավատքի ուղղափառությունը։ Կիրակոս Գանձակեցին այս մասին գրում է. «...զամօթի հարան յոյնքն ամենայն, եւ ակամայ գովէին զհաւատս Հայոց...»։ Ըստ պատմագիրների հաղորդած տեղեկությունների՝ երբ կաթողիկոսը մյուռնոք կաթեցնում է գետի մեջ, ջուրը լույս է ճառագում, եւ գետի ջրերը հայրապետի աղոթքով հետ են հոսում։

Ժ դարի պատմիչները պարսկական տիրապետության շրջանից ուշագրավ դրվագներ են փոխանցում Երեւանի Հրազդանի ձորում կատարված ջրօրհների արարողություններից։

Պարսից Շահ Աբասին, թերեւս, ակնհաճ է եղել հայկական ջրօրհների հան-

դեսը, եւ հավանաբար այս պատճառով է, ինչպես վկայում է Ջաքարիա Սարկավազը, որ շահը կարգադրել է ամեն տարի իր ներկայությամբ ջրօրհներ անել։ Նրա օրինակով Երեւանի պարսից բոլոր խաները եւս հետագայում ներկա են եղել Հայ եկեղեցու ջրօրհներին։

Այսպես՝ Ջաքարիա Սարկավազը հայտնում է, որ Քոթուկ խանը պատվիրում է Փիլիպոս Ա Աղբակեցի կաթողիկոսին (1632–1655 թթ.) իր ներկայությամբ կատարել ջրօրհները։ Պատմիչի վկայության համաձայն՝ պարսից խանն իր վրանը խփում է Հրազդան գետի ձախ ափին՝ խնկելաձորում, որն այժմ կոչվում է Ձորագյուղ։ Այստեղ եւ կատարվում է ջրի օրհնությունը։

Ջաքարիա Ազուլեցին հիշատակում է 1676 թվականի ջրօրհները, երբ Հակոբ Դ Ջուղայեցի կաթողիկոսը (1655–1680 թթ.), գալով Երեւան, «հրաշալի ջրաւրինք արաւ»։

Ջրօրհների մեկ այլ ուշագրավ դրվագ է Երասխի ջրերում Ամենայն Հայոց Կաթողիկոս Աբրահամ Գ Կրետացու (1734–1737 թթ.) կատարած արարողությունը։ Մուղանի դաշտում Նադիր շահի թագադրությանը հրավիրված կաթողիկոսը 1736 թվականի հունվարի 6-ին՝ Սուրբ Ծննդյան տոնին, իր մոտ է կանչում կաթողիկոսի եւ Երասխի ափին տեղակայված կաթողիկոսական վրանում մշում տերունական տոնը։ Ապա, ինչպես իր «Պատմության» մեջ վկայում է ինքը՝ Աբրահամ Գ Կրետացին, ուղղվելով դեպի գետեզր, կատարում է ջրօրհնաց կարգը, որին մասնակցում են ոչ միայն հայեր։ Մեծ է լինում կաթողիկոսի զարմանքը, երբ տեսնում է, թե ինչպես են արարողությանը ներկա պարսիկները Երասխի մյուռնոխառն ջրով օծում իրենց երեսները։

Գետի ջրերում ջրօրհներ կատարելու ավանդույթը երկար տարիներ պահպանվել է նաեւ Վրաստանի եւ Իմերեթի հայոց թեմում։ Այսպիսի ջրօրհներ կատարվել է Թիֆլիսի Քուռ գետում։

Գեղանկարիչ Հմայակ Հակոբյանի «Հին Թիֆլիս» ալբոմում տեղ է գտել երկու մատիտանկար, ուր պատկերված է 1885 թվականի ջրօրհները։ Դրանցից մեկում եկեղեցականների եւ հավատացյալների բազմամարդ հանդիսավոր թափորն է, որ այսօր արդեն ավերված Վանքի մայր տա-



«Ջրօրհներ կան հայկական Հորդանան»



«Հորդանան Քուռ գետի վրա». լուսանկարները՝ Լ. Հիդիլյանի հավաքածուից

ճարից շարժվում է դեպի Քուռ գետը, մյուսում պատկերված է Քոի վրա հատուկ այդ արարողության համար կառուցված կամուրջը։

Հին Թիֆլիսում մեծ ժողովրդականություն վայելած այս արարողության մասին հետաքրքիր մանրամասներ է հաղորդում նաեւ Լեւոն Հիդիլյանն իր «Ջրօրհներ կան հայկական Հորդանան» հոդվածում՝ այն ամբողջացնելով արարողությունը պատկե-


րող ԺԺ դարի արխիվային մի քանի լուսանկարներով։

Ըստ Լ. Հիդիլյանի՝ Վանքի առաջնորդափայտ եկեղեցուն հունվարի 6-ին մատուցված Սուրբ Ծննդյան պատարագից հետո հոգեւորականներից ու Թիֆլիսի եւ շրջակա գյուղերից ժամանած հայ հավատացյալներից կազմված մեծահամդես թափորն ուղղվում էր դեպի գետեզր։ Ջրօրհները կատարվում էր հատուկ այս արարողության համար կառուցված գմբեթավոր շինությունում՝ թեմակալ առաջնորդի նախագահությամբ եւ Թիֆլիսի հայկական եկեղեցիների 50-հոգանոց միացյալ երգչախմբի երգեցողությամբ՝ համընդհանուր ցմնություն պարգեւելով ներկաներին։

Հայտնի է նաեւ, որ 1895 եւ 1899 թվականներին, գտնվելով Թիֆլիսում, տոնակատարության իր ներկայությամբ մեծ շուր է հաղորդել Ամենայն Հայոց Կաթողիկոս Սկրտիչ Ա Վանեցին (հրիմյան Հայրիկ, 1892–1907 թթ.)։

Թիֆլիսում «հայկական Հորդանան» անվանումն ստացած բավականին տպավորիչ ջրօրհների մասն արարողությունները դադարել են միայն Ի դարում՝ խորհրդային կարգերի հաստատումից հետո։

Հեղինակ՝ ՄԿՐՏՅԱՆ



Սուրբ Ներսիսյան որոշ ավանդույթներ հայոց մեջ

Նայ Առաքելական Սուրբ եկեղեցին մեր Տեր Հիսուս Քրիստոսի Ծնունդը եւ Աստվածափայտությունը (մկրտությունը) տոնում է միասին՝ հունվարի 6-ին։ Սուրբ Ծնունդը մեզ՝ հայերիս համար ամենասիրելի եւ սպասված տոնն է, որը մշվում է հատուկ կարգով։ Հայոց մեջ այս տոնի հետ կապված բազմաթիվ ավանդույթներ են պահպանվել։ Բոլոր վայրերում սուրբծննդյան տոնակատարությունն սկսվում է երեկոյան ճրագալույցի արարողությամբ։ Մարդիկ իրենց ընտանիքի անդամների հետ մասնակցում են ճրագալույցի Սուրբ Պատարագին, ապա ստանալով հաղորդություն՝ տոնակատարությունը շարուն-

ակում են տանը՝ ավանդական ուտեստներով զարդարված սեղանի շուրջ։ Սուրբ Ծնունդի գիշերը հայոց մեջ հայտնի է եղել նաեւ «թաթախման գիշեր» եւ «խթան գիշեր» անվանումներով (տես Դ. Խառատյան-Առաքելյան, Հայ ժողովրդական տոները, Երեւան, 2000, էջ 34)։ Հնում պարտադիր է համարվել եկեղեցուց ընտանիքի անդամների թվով մոմեր բերելը. դրանք վառում էին յուրաքանչյուրի սպասքի մոտ։ Մեկշաբաթյա պահեցողությունից հետո սեղանին դրվում էին զանազան կերակուրներ՝ ձկնեղենից պատրաստված ուտեստներ, փլավի տարբեր տեսակներ՝ բրնձով, արիշտայով, խաշի, հարիսա, տարբեր անուշեղեններ։

Համշենահայ տանտիրուհիները թխում էին բաղադր, որի մեջ մետաղադրամ էին դնում։ ճրագալույցին, ըստ ընտանիքի անդամների թվի, այն հավասար կտրում էին։ Երբեմն բաժին էր հասնում նաեւ հյուրերին։ Ըստ ավանդույթի՝ մետաղադրամ ուն բաժին ընկներ, նրան ողջ տարվա ընթացքում հաջողությունն ուղեկից կլիներ։ Որոշ վայրերում մետաղադրամի փոխարեն հացի մեջ ուղւնք էին դնում։

Մշեցիներն այդ օրը պարտադիր պատրաստել են «Մայրամա ճաշ» կոչվող ապուրը, որի մեջ գցել են սպիտակ բանջար, մայրամա բանջար եւ սիսեռ։

→ էջ 8



ԴՄԻՏՐԻ ԼԻՍԱԶՈՎ ՆԱՄԱԿՆԵՐ ԲԱՐՈՒ ՄԱՍԻՆ



Սկիզբը՝ 2022, թիվ 19–24

Նամակ քսաներորդ ԻՆՉՊԵՍ ԵԼՈՒՅԹ ՈՒՆԵՆԱԼ

Հանրային բանավոր ելույթներն այժմ սովորական են դարձել մեր կյանքում։ Ամեն ոք պետք է կարողանա ելույթ ունենալ ժողովների ժամանակ, հնարավոր է նաև՝ հանդես գալ դասախոսություններով եւ գեկույցներով։

Բոլոր դարերում հազարավոր գրքեր են գրվել ճարտասանների եւ դասախոսների արվեստի մասին։ Այստեղ պետք չէ կրկնել այն ամենը, ինչ հայտնի է ճարտասանական արվեստի վերաբերյալ։ Միայն մի բան կասեմ՝ ամենապարզը. որպեսզի ելույթն ուշագրավ լինի, հենց խոսողին պետք է հետաքրքիր լինի ելույթ ունենալը։ Նրան պետք է հետաքրքիր լինի սեփական տեսակետը ներկայացնելը, դրանում համոզելը, դասախոսության մյուսը պետք է հենց նրա համար գրավիչ, ինչ-որ չափով արտասովոր լինի։ Խոսողն ինքը պետք է հետաքրքր-

ված լինի իր ելույթի առարկայով եւ կարողանա դա փոխանցել լսողներին՝ նրանց ստիպելով զգալ բանախոսի հետաքրքրվածությունը։ Միայն այդ դեպքում հետաքրքիր կլինի նրան լսելը։

Եվ մի բան էլ. ելույթում չպետք է լինեն մի քանի հավասարազոր մտքեր, գաղափարներ։ Յուրաքանչյուր ելույթում պետք է լինի մեկ գերիշխող գաղափար, մեկ միտք, որին ենթարկվում են մյուսները։ Այդ ժամանակ ելույթն ոչ միայն կհետաքրքրի, այլև կհիշվի։

Իսկ ըստ էության՝ մշտապես ելույթ ունեցեք բարի դիրքերից։ Անգամ արտահայտվելով ինչ-որ գաղափարի, մտքի դեմ ձգտեք դա կառուցել որպես աջակցություն այն դրականին, որն առկա է ձեզ հետ բանավորողի առարկություններում։ Հանրային ելույթը միշտ պետք է լինի հանրային դիրքերից։ Այդ ժամ այն կարծանա համակրանքի։

Նամակ քսանեկերորդ ԻՆՉՊԵՍ ԳՐԵԼ [Ա մաս]

Յուրաքանչյուր մարդ պետք է լավ գրի այնպես, ինչպես որ լավ խոսում է։ Խոսքը՝ գրավոր կամ բանավոր, առավել է բնութագրում մարդուն, քան նույնիսկ նրա արտաքինը կամ վարվելակերպը։ Խոսքում դրսևորվում են մարդու կիրք լինելը, ճիշտ եւ ուղիղ մտածելու կարողությունը, մյուսների հանդեպ հարգանքը, «կոկիկությունը»՝ այդ բառի լայն իմաստով։

Այժմ կխոսեմ միայն գրավոր խոսքի վերաբերյալ եւ մեծավ մասամբ գրավոր խոսքի այն տեսակի մասին, որին ես ինքս առավելաբար սովոր եմ, այսինքն՝ գիտական աշխատանքի (հիմնականում գրականագիտական) եւ ընթերցողների լայն շրջանակի համար գրված ամսագրային հոդվածների լեզվի մասին։

Ամենից առաջ մեկ ընդհանուր դիտողություն։ Հեծանիվ վարել սովորելու համար անհրաժեշտ է հեծանիվ վարել։ Գրել սովորելու համար պետք է գրել։ Չեք կարող ձեզ շրջապատել լավ խորհուրդներով, թե ինչպես լավ գրել, եւ անմիջապես սկսեք գրել ճիշտ ու լավ. որեւէ բան չի ստացվի։ Ուստի նամակներ գրեք ընկերներին, օրագիր պահեք, հիշողություններ գրեք (դրանք կարելի է եւ անհրաժեշտ է գրել որքան հնարավոր է վաղ՝ վատ չէր լինի նույնիսկ պատանեկան տարիներին. օրինակ՝ ձեր մանկության վերաբերյալ)։

Հաճախ խոսում են այն մասին, որ գիտական աշխատություններն ու դասագրքերը գրվում են չոր լեզվով, լի են գրասենյակային դարձվածքներով։ Այս առումով հատկապես «բաժին է հասնում» գրականագիտական եւ պատմագիտական աշխատություններին։ Եվ մեծավ մասամբ այս մեղադրանքներն արդարացի են։ Արդարացի են, սակայն շատ որոշակի չեն։ Անհրաժեշտ է գրել լավ, եւ պետք չէ վատ գրել։ Դա որեւէ մեկը չի ժխտում, եւ դժվար թե գտնվեն մարդիկ, որոնք հանդես կգան հա-

կառակ տեսակետով։ Բայց ահա որն է «լավ լեզուն», եւ ինչպես ձեռք բերել լավ գրելու հմտություններ, այդ մասին հազվադեպ են գրում։

Իրականում «լավ լեզուն», որպես այդպիսին, գոյություն չունի։ Լավ լեզուն գեղագրությունն է, որը ցանկացած առիթով կարելի է կիրառել։ Մաթեմատիկական աշխատանքի լավ լեզուն, գրականագիտական հոդվածի լավ լեզուն կամ վիպակի լավ լեզուն տարբեր լավ լեզուներ են։

Հաճախ ասում են. «Նրա հոդվածի լեզուն լավն է, գունեղ է», եւ դպրոցում նույնիսկ դասարանային աշխատանքների համար պահանջում են լեզվի պատկերավորություն։ Մինչդեռ լեզվի գունեղությունը միշտ չէ, որ գիտական լեզվի արժանիքն է։

Գեղարվեստական գրականության լեզուն պատկերավոր է, սակայն գիտականի տեսանկյունից՝ ոչ ճշգրիտ։ Գիտությունը պահանջում է միանշանակություն, մինչդեռ գեղարվեստական լեզվում առաջնային նշանակություն ունի հակառակը՝ բազմիմաստությունը։ Օրինակ՝ Եսեմինի տողերը.

*Տափաստանային վազքում խելահեղ
Արտավելու չափ զանգն է քրքջում։*
(թարգմ.՝ Վ. Դավթյանի)

Մեր առջեւ պատկեր է՝ բովանդակությամբ շատ հարուստ, բայց ոչ միանշանակ։ Ինչ է սա. զանգակի զվարթ ղողմնջ։ Իհարկե ոչ միայն դա։ Չափազանց կարեւոր է, որ այս տողերում հիշատակվում են նաև արցունքները, թեւե մակերեսային ընթերցման ժամանակ կարելի է եւ դրանց հատուկ նշանակություն չտալ՝ ընդհանուր առմամբ ամբողջ արտահայտությունն ընդունելով որպես սովորական դարձվածք. շատ ուժեղ քրքջալ։ Պատկերը հստակեցնում է իր նշանակությունն ընդհանուր բովանդակության շնորհիվ եւ լիովին հասկանալի է դառնում միայն բանաստեղծության վերջում.

*Քանի որ անցյալ իմ կյանքի վրա
Արտավելու չափ զանգն է քրքջում։*

Այստեղ հանդես է գալիս ճակատագրի հեզմանքի թեման՝ ճակատագրի՝ մարդկային կյանքի անցողիկ երեւոյթների վրա ծիծաղող։

Ընթերցողն աստիճանաբար ասես թե «կռահում» է գեղարվեստական կերպարը։ Գրողն ընթերցողին դարձնում է իր ստեղծագործության մասնակիցը։ Գեղարվեստական կերպարի այս աստիճանական ինքնաբացահայտումը եւ ընթերցողի մասնակցությունը ստեղծագործական ընթացքին՝ գեղարվեստական ստեղծագործության շատ էական կողմն են։ Դրանից է կախված ոչ միայն այն գեղագիտական հաճույքը, որն ստանում ենք գեղարվեստական ստեղծագործություն ընթերցելիս, այլ նաեւ դրա համոզիչ լինելը։ Հեղինակը կարծես ստիպում է հենց ընթերցողին հանգել անհրաժեշտ եզրակացության։ Նա ընթերցողին դարձնում է, կրկնում եմ, ստեղծագործության մեջ իր գործակիցը։

Նույնը կարելի է եւ ասել գեղարվեստական ստեղծագործության այն տեսակի մասին, որ կատակն է։ Կատակն անփոխարինելի է, օրինակ, բանավեճի ժամանակ։ Ստիպել ունկնդիրներին ծիծաղել նշանակում է նրանց կիսով չափ համոզել սեփական իրավացիության մեջ։ Գեղարվեստական պատկերն ու կատակը ստիպում են ընթերցողին կամ ունկնդրին դրանց հեղինակի մտքի ընթացքի մասնակիցը դառնալ։ Ֆրանսիական ասացվածքն ասում է. «Կարելու է, որ ծիծաղողները լինեն քո կողմին»։ Ուն հետ, որ ծիծաղում են՝ վիճաբանության հաղթողն է։

Կատակը կարելու է դժվարին իրավիճակներում. դրանով վերականգնվում է հոգեկան հավասարակշռությունը։ Սովորովը



կատակի միջոցով քաջալերում էր իր զինվորներին։

Ուստի այնտեղ, որտեղ անհրաժեշտ է ոչ միայն տրամաբանական, այլ նաեւ զգացմունքային համոզումնք, շատ կարեւոր են գեղարվեստական պատկերն ու կատակը։ Դրանք կարեւոր են գիտահանրամատչելի աշխատության մեջ եւ ճարտասանական ելույթներում։ Յուրաքանչյուր դասախոս գիտի, թե որքան կարեւոր է թուլացած լսարանի ուշադրությունը կատակի միջոցով վերականգնելը։ Կատակը նույնիսկ ավելին, քան գեղարվեստական պատկերը, պահանջում է գործուն մասնակցություն. այն ստիպում է ունկնդիրներին ոչ միայն կրավորաբար լսել, այլ նաեւ գործուն կերպով «ընկալել» սրամտությունը։

Սակայն գիտական աշխատության մեջ պատկերավորությունն ու սրամտությունը թույլատրելի են միայն որպես բուն մյուսից շեղման մի տեսակ։ Գիտական լեզուն իր բնույթով կտրուկ տարբերվում է գեղարվեստական գրականության լեզվից։ Այն պահանջում է արտահայտման ճշգրտություն, առավելագույն հակիրճություն, խիստ տրամաբանություն, բացասում է ցանկացած «մտաշահարկում»։

Գիտական լեզվում չպետք է «զգացվի թանաքը». այն պետք է լինի թեթեւ։

Գիտական աշխատանքի լեզուն պետք է լինի «աննկատ»։ Եթե ընթերցողը գիտական աշխատություն կարդա եւ ուշադրություն չդարձնի՝ այն լավ թե վատ է գրված, ուրեմն այն լավ է գրված։ Լավ դերձակը կոստյումն այնպես է կարում, որ այն կրում ենք «առանց նկատելու»։ Գիտական շարադրանքի ամենամեծ առավելությունը (այստեղ արդեն խոսում եմ ընդհանրապես շարադրանքի վերաբերյալ, այլ ոչ միայն լեզվի) մտքից միտք անցումների տրամաբանությունն ու հետեւողականությունն են։

Միտքը զարգացնելու կարողությունը ոչ միայն տրամաբանություն, այլ նաեւ շարադրանքի հստակություն է։

Շատ կարելու է, որ գիտնականը «զգա» իր ընթերցողին, ստույգ իմանա, թե ուն է դիմում։

Անհրաժեշտ է միշտ որոշակիորեն պատկերացնել կամ երեւակայել ապագա աշխատության ընթերցողին եւ, ասես թե, գրի առնել նրա հետ քո ունեցած զրույցը։ Թող այդ երեւակայական ընթերցողը լինի թերահավատ, մոլի վիճաբանող, մարդ, որը հակված չէ հավատ ընծայելու որեւէ բանի։ Խիստ գիտական աշխատանքում ընթերցողի այդ մտապատկերը պետք է լինի բարձր. երեւակայական ընթերցողը պետք է լինի ներկայացվող ոլորտի մասնագետ։ Գիտահանրամատչելի աշխատություններում այդ երեւակայական ընթերցողը պետք է լինի մի փոքր դժվար ընկալող (բայց չափավոր, սեփական ընթերցողին պետք չէ «վիրավորել»)։ Նման երեւակայական ընթերցողի հետ զրուցելիս գրի առեք այն ամենը, ինչ ասում եք նրան։ Որքան ձեր գրավոր լեզուն մոտ լինի խոսակցական լեզվին, այնքան լավ. այնքան այն ավելի ազատ, բազմաձեւ, շեշտադրությամբ առավել բնական կլինի։ Գրավոր խոսքին հատուկ դարձվածքներ լեզուն ծանրացնում են. դրանք անհրա-

ժեշտ չեն։ Սակայն բանավոր լեզուն ունի նաեւ մեծ պակասություններ. այն միշտ չէ, որ ճշգրիտ է, այն տնտեսող չէ, դրանում հաճախադեպ են կրկնաբանությունները։ Ուրեմն՝ ձեր խոսքը երեւակայական ընթերցողի համար գրի առնելով՝ անհրաժեշտ է այնուհետեւ եւս հնարավորին չափ կրճատել, ուղղել, ազատել անճշտություններից, չափից դուրս ազատ, «խոսակցական» արտահայտություններից։ Գիտական աշխատությունը «կսեղմվի», կդառնա հավաք, ճշգրիտ, բայց կպահպանի կենդանի խոսքի շեշտադրումը, եւ ամենակարեւորը՝ դրանից հստակ կդառնա հասցեատերը՝ հեղինակի երեւակայական զրուցակիցը։

Գրավոր լեզվի հարստացումն ու թեթեւությունը հաճախ ծագում են խոսակցական լեզվից։ Խոսակցական լեզվից կարելի է փոխառել առանձին բառեր եւ ամբողջական արտահայտություններ։ Սակայն անհրաժեշտ է հիշել, որ խոսակցական արտահայտությունները գրական լեզվում ոճաբանական առումով այնքան ուժեղ եւ նկատելի են, որ գիտական ճշգրիտ լեզվում դրանք չպետք է կրկնել միմյանց մոտ։

Շարունակելի

Ուսերենից թարգմանությունը՝
Տ. Անդրեաս վրդ. ԵՁԵԿՅԱՆԻ

Տարեմուտի խորհուրդը

Տարեմուտի (ամանոր, կաղանդ, տարեգլուխ) տոնակատարությունը մեզ է հասել դարերի խորքից: Ըստ Ս. Գրիգոր Տաթևացու՝ Բաբելոնյան աշտարակաշինությունից հետո ազգերն իրենց վիճակված վայրը գնալով՝ հեռավոր կամ մոտ գտնվող, այդ օրը որպես տարեմուտ կարգեցին եւ իրենց որդիներին պատվիրեցին պատվել այդ օրը՝ նվերներ տալով: Այս իրադարձությունը դառնում է ազգերի համար ժամանակը հաշվելու սկիզբը: Տարեմուտը նշվել է նաեւ գարնանը՝ բնության զարթոնքի, կամ աշնանը՝ բերքահավաքի շրջանում:

Մեր նախնիները տարեմուտը նշել են Նավասարդի (զենդերեն՝ նավ՝ նոր, սարդ՝ տարի) 1-ին, մեր օրացույցով՝ օգոստոսի 11-ին, այսինքն՝ այն օրը, երբ Հայկ նահապետն իր լայնալիճ աղեղով նետահարեց «գոռոզացած տիտանյան Բելին»: Այսպես սկիզբ է առնում Հայոց բուն թվականը կամ Հայոց հին շարժական տոմարը, որը, ըստ Ղեւոնդ Ալիշանի, համընկնում է մ. թ. 2492 թվականին, իսկ նորագույն հետազոտությունների հիմամբ՝ մ. թ. 2341-ին:

Հին Կտակարանում հրեաների՝ եգիպտական գերությունից ազատագրման ամիսն աստվածադիր օրենքով դարձավ տարվա առաջին ամիսը. «Այս ամիսը թող ձեզ համար ամիսների սկիզբը լինի. այն թող տարվա առաջին ամիսը լինի» (Ելք ԺԲ 2), ինչը խորհրդանշում էր հրեաների հոգեւոր նոր կյանքը: Սակայն բուն Նոր տարին՝ պայմանավորված իրադարձությունների կարեւորությամբ, նշվում է նրանց օրացույցի 7-րդ՝ Թիշրի՝ մեր սեպտեմբեր-հոկտեմբերին համապատասխանող ամսին: Հրեական Նոր տարին Ռոշ հաշման (հայերեն՝ տարեգլուխ), համընկնում է Թիշրի ամսվա 1-ին եւ 2-ին՝ աշխարհի արարմանը, որը, ըստ քրիստոնեական թվագրության, մ. թ. 5508 թվականն է, իսկ համաձայն երախականի՝ մ. թ. 4004-ը՝ անկախ մերօրյա գիտության՝ աշխարհի տարիքը միլիոնավոր տարիներով թվագրելու փորձերից:

Համաձայն Հին Կտակարանի՝ ոչ միայն տարեմուտին, այլ նաեւ բոլոր ամսագլուխներին՝ ամսվա առաջին օրերին, հատուկ զոհաբերություն-



ներ էին սահմանված: Ընդ որում՝ դրանք պետք է ազդարարվեին փող հնչեցնելով: Այսպես՝ սինագոգներում Նոր տարվա առաջին երկու օրերին եղջերափողը հնչեցվում էր հարյուր անգամ, եւ այն ապաշխարության՝ անցած տարին վերաթելուրելու եւ նոր տարվան նախապատրաստվելու խորհուրդն ուներ: Ըստ երախական ավանդության՝ Աստված ժամանակի ու կյանքի Տերը, այդ օրերին յուրաքանչյուր մարդու կյանքի շարունակականության վերաբերյալ վճիռ է կայացնում, իսկ մարդն այդ օրերին պետք է աղոթի ու կյանք խնդրի: Այս աղոթքներն աստվածաշնչական աղոթքների մեջ ամենաերկարաշունչներից են. սկսվում են վաղ առավոտյան ու տևում մինչև ցերեկ:

Մինչև Հուլիոս Կեսարի իրականացրած բարեփոխությունը՝ Հուլյան տոմարը, եւ 1582 թվականին Հռոմի Գրիգոր ԺԳ պապի հաստատած նոր տոմարը Արեւմուտքում կենցաղավարում էր Հռոմեական տոմարը: Ընդ որում՝ հռոմեացիները, որ ժամանակի հաշվարկի սկիզբ էին ընտրել Հռոմի հիմնադրումը՝ մ. թ. 753 թվականը, այդ տոմարի ստեղծման երախտիքը

վերագրում էին Հռոմի հիմնադիր Հռոմուլոսին: Տոմարը նախապես բաղկացած էր 304 օրից՝ 10 ամիսների ամբողջությամբ (մարտից մինչև դեկտեմբեր. այս վերջինը, ի դեպ, թարգմանվում է տասներորդ): Ի սկզբանե հռոմեացիները Նոր տարին նշում էին գարնան առաջին օրը՝ մարտի 1-ին. այդ օրը կատարվում էր ձմռան արտաքսման արարողությունը: Ավելի ուշ շրջանում հռոմեացիները հավելեցին եւս 50 օր՝ երկու ամիս. հունվարը, որ դարձավ առաջին ամիսը, կոչվեց ի պատիվ Յանուս դիքի՝ տան դռան եւ քաղաքի դարպասների պահապանի: Յանուսը երկդիմի էր՝ մի դեմքով նայում էր հետ՝ անցյալին, մյուսով՝ առաջ՝ ապագային: Իսկ մ. թ. 153 թվականից տարեմուտն սկսվում էր հունվարի 1-ից, քանզի կոնսուլները հենց այդ օրն էին ստանձնում իրենց պաշտոնը: Սակայն հունվարի 1-ին արդիական ըմբռնմամբ Նոր տարին նշելու սովորույթը պայմանավորված է քրիստոնեության տարածմամբ եւ Սուրբ Ծնունդով:

Ինչ վերաբերում է քրիստոնեական թվագրությանը, ապա երկար ժամանակ սկիզբ է ծառայել աշխարհի արարումը, այն է՝ մ. թ. 5508 թվականը: Սակայն 2 դարում մի կաթոլիկ հոգեւորական՝ Դիոնիսիոս Կրտսերը, տարիներն սկսեց հաշվել Հիսուս Քրիստոսի ծնունդից: Ժամանակը հաշվելու այս սկզբունքը համահունչ էր Կաթոլիկ եկեղեցու տարեկան ծիսական շրջանին, քանզի Նոր տարին՝ հունվարի 1-ը, արդեն ընկնում էր դեկտեմբերի 25-ին նշվող Սուրբ Ծննդյան տոնի 8-րդ օրը: Այս թվագրությունը եւ հունվարի 1-ը՝ իբրեւ տարեմուտ, աստիճանաբար տարածվեցին Գերմանիայում ԺԶ, Ֆրանսիայում ԺԷ, Անգլիայում ԺԸ դարերից:

Ռուսաստանում, որտեղ Նոր տարին նշվում էր սեպտեմբերի 1-ին, Պետրոս Մեծի հրամանով՝ 1700 թվականից սկսյալ, քրիստոնյա մյուս ժողովուրդների օրինակով, հունվարի 1-ը հռչակվում է Տարեմուտ: Հայաստանում Գրիգորյան տոմարը պաշտոնապես ընդունվում է 1920 թվականին՝ անմիջապես խորհրդային կարգերի հաստատումից հետո. Հայաստանյայց եկեղեցին այն ընդունում է 1923 թվականին:

Այսօր Ամանորի գլխավոր զարդը՝ երեխաների ուրախության եւ խնդրյալ աղբյուրը, եղենին է՝ տոնածառը. այն ոչ թե «ամանորյա տոնածառ» է, այլ «Սուրբ Ծննդյան եղենի»:

Թեեւ գերմանական ցեղերը վաղնջական ժամանակներից երկյուղալից վերաբերմունք ունեին եղենու նկատմամբ, սակայն նրա խորհուրդը կապված է մի բրիտանացի վանականի հետ, որը կաղնին աստվածացնող գերմանացի դրոփողների հետ բանավիճելիս տապալում է մի կաղնի: Կաղնին ընկնելով կոտորում է կողքի ծառերը՝ բացի մի եղենուց, որը եւ վանականը՝ Բոնիֆացիոսը, անվանում է «Մանուկ Հիսուսի եղենի»: Հարկ է նշել, որ մինչև ԺԶ դարը եղենիները, իբրեւ տոնական ծառ, ոչ թե կտրում, այլ տնկում էին Սուրբ Ծննդյան տոներին:

Տոնածառն իր խորհրդով քրիստոնեության մեջ ընկալվում է իբրեւ վերին Կենաց ծառի, որը նախածնողների մեղանշմամբ՝ բարու եւ չարի գիտության ծառի պտուղը ճաշակելու պատճառով, դարձավ անմատչելի ու երանելի բաղձանք մարդկության համար:

Քրիստոնեական աշխարհում եղենին կոչվում է նաեւ Սուրբ Ծննդյան ծառ, քանզի խորհրդավորապես կապվում է Կենդանի կենաց ծառի՝ Հիսուս Քրիստոսի հետ: Տոնածառի գագաթը պսակող աստղը բեթլեհեմյան աստղն է, որն Արեւելքից ելած մոգերին առաջնորդում էր դեպի քաղաք, որտեղ պիտի ծնվեր Փրկիչը: Եվ ինչպես մոգերն ընծաներ բերեցին մանուկ Հիսուսին, այնպես եւ մենք ենք նվերներ բերում Կենաց ծառին:

ԺԶ դարում Գերմանիայում տոնածառը զարդարում էին գունավոր թղթից պատրաստված ծաղիկներով, մրգերով, ոսկեգոծ առարկաներով, որոնք իրենց ծանրության պատճառով աստիճանաբար դուրս մղվեցին գործածությունից՝ իրենց տեղը զիջելով ապակեգործ արհեստավորների պատրաստած գեղեցիկ սնամեջ խաղալիքներին: Լույսերի մեջ ողողված եղենին (նաեւ այսօր գործածվող էլեկտրական լամպերի շղթան) խորհրդանշում է հոգեւոր լույսը, որով Փրկիչը լուսավորեց ողջ աշխարհը: Իսկ բովանդակ՝ փայլվող ու զարդարուն եղենին խորհրդանշում է շնորհների արքայությունը՝ Փրկչի ծննդյամբ աշխարհին պարգեւված:

Գրիգոր ԴԱՐԲԻՆՅԱՆ

Սուրբ ծննդյան որոշ ավանդույթներ հայոց մեջ

← էջ 6

Նրանք հավատում էին, որ այդ բանջարն Աստվածամայրն է քաղել, եւ դրան բուժիչ ու զորեղ հատկություն էին վերագրում:

Քրիստոսի սուրբծննդյան բարի լուրը մարդիկ ստանում էին նաեւ մի խումբ փոքրիկներից, որոնք տնետուն ընկած երգում էին ավետիսներ: Որոշ վայրերում քահանան նշխար էր պատրաստում ու երեխաների հետ տնետուն ընկած բաժանում, հայտնում մեծ ուրախությունը: Համաձայն Գարեգին Սրվանձտյանցի հաղորդած տեղեկության՝ Վանում երեխաներն իրենց հետ վերցնում էին երկարավուն դրոն, որի մեջ դնում էին ճրագը եւ կախում տների երդիկներից (տե՛ս «Հայոց տոնածիսական մշակույթն ըստ գեղանկարչուհի Լուսիկ Ազուլեցու ստեղծագործությունների», Երեւան, 2015, էջ 66): Երեխաները երգում էին ավետիս եւ ակնկալում ստանալ ձու, ամուլեղեն, թխվածքաբլիթ եւ այլն. իրենց հավաքածը նրանք բաժանում էին աղքատներին կամ խնջույք էին կազմակերպում:

Գյուղերում տարեցներն այցելում էին սգավոր ընտանիքներին՝ իրենց հետ տանելով նվերներ. այդ կերպ փորձում էին վշտակիրներին «հանել սգից»:

Հայերը Սուրբ Ծնունդի երեկոյի հետ կապված տարաբնույթ պատկերացումներ ունեին: Այդ գիշերը հոսող ջրերին վերագրվում էր հատուկ զորություն: Այսպես՝ հավատում էին, որ ջրերը մի ակնթարթ կանգ են



ամռան, եւ եթե այդ պահին որեւէ մեկը ինչ-որ իր է նետում ջուրը, ապա այն, անշուշտ, ոսկյա է դառնում:

Գանձակում ամուլ կանայք Սուրբ Ծնունդի գիշերը երեք անգամ մտնում էին ջուրը՝ հավատալով, որ սրբագործված ջուրն իրենց զավակ կպարզելի: Քեսաբցիների շրջանում Աստվածորդու ծննդյան գիշերը տարեց կանայք արթնացնում էին պատանիներին, որոնք արագ վազելով՝ գնում, գետից քար էին հանում եւ բերում, դնում էին իրենց պարտեզի ծառերից մեկի տակ, որից

մեծ բերք էին ակնկալում: Այս ամենը պարտադիր կատարում էին առանց հետ մայելու. հետո վազում էին տուն, որտեղ արդեն կրակ էր վառված լինում:

Այս ծեսը կատարում էին, որ իրենց պարտեզն առատ բերք տար:

Ջրի հետ կապված ավանդույթներն առհասարակ կարեւորվում էին, քանի որ այդ օրը կատարվում էր Ջրօրինեքը: Հոգեւորականն այդ օրը խաչով եւ սրբալույս մյուռնով օրհնում էր ջուրը. մարդիկ հավաքվում էին՝ օրհնված ջուր տանելու: Ջուրն իրենց հետ տանում, խմեցնում էին հիվանդներին կամ քսում նրանց մարմնի ցավող տեղերին: Օրհնված ջրով նաեւ վանում էին

պղծված սպասքը (որոնց շները, մկներն էին դիպել), լցնում էին հացամանների, յուղամանների, ամբարների մեջ, որ երբեք պակասություն չլինի:

Առանձնակի կարեւորվում էր խաչքավորի ընտրությունը. հիմնականում ընտրում էին բարեգործություններ կատարող անձի: Որոշ տեղեկությունների համաձայն՝ Ջրօրինեքի ժամանակ աղավմիներ էին թոցնում: Այդ օրը կազմակերպում էին բազմաթիվ խաղեր, մրցույթներ եւ այլն: Երբեմն երիտասարդները վազում, ջրի միջից վերց-

նում էին խաչը եւ չէին վերադարձնում այն-քան ժամանակ, մինչեւ խաչքավորը նվեր էր տալիս:

Հայոց մեջ Սուրբ Ծննդյան եւ Աստվածահայտնության տոնը եղել ու մնում է ամենասիրելի եւ տոնելի:

Գոհարիկ ԴԱՍԱՐՅԱՆ

ՔՐԻՍՏՈՆՅԱ ՉԱՅԱՍՏԱՆ

Կրոնական, մշակութային, լրատվական երկշաբաթաթերթ

Հիմնադիր՝

Մայր Աթոռ Սուրբ Էջմիածին

Հրատարակիչ՝

«Քրիստոնյա Հայաստան»

թերթի խմբագրություն

Գլխավոր խմբագիր՝

Արփիկ Զանգիկյան

Գրանցման վկայական՝ 624

խմբագրության հասցեն՝

Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝

qristonyahayastan1@gmail.com

qristhay@etchmiadzin.am

web կայք՝

krishayas.wordpress.com

etchmiadzinlibrary.am/en/kristonya-hayastan

Ստոր. տպագր. 16.01.2023 թ.

Տպաքանակը՝ 1225